

壬癸志稿十

太倉錢寶琛伯瑜輯

同里

葉裕仁涵溪
季錫疇菘耘
趙兆熊耳山
畢庭杰雄伯

參校

人物

太倉州

藝苑

明

周位字元素博學多材藝尤精畫洪武初徵入畫院宮掖山水畫壁多位筆同業害其能卒死於讒

張彥才善傳神楊維禎常主其家為詩畫交子子明繼

壬癸志稿

藝苑

一

之永樂間徵至京有名公卿間

趙楷字宗範精字學永樂中以善書除廣西都昌縣丞范暹字啓東畫翎毛花竹永樂中入畫院暹藝精負賞鑑一時愛重之

陸伯倫居直塘工楷書永樂中薦為中書舍人

謝克銘字用拙宣德間以草書馳名

盧瑛字克修彭祖孫宣德五年進士性敏學博工古文篆籀不減夏泉泉每語人曰吾墨竹一派近在玉潤瑛蓋泉壻也終刑部主事

張翬字文翥畫山水宗馬夏家法至老益工弟翌字文

翔慷慨尙氣節善書宗歐顏二家大者可方斗其書龍門諫院題名記尤超偉天順間從數千里歸方入城道遇故人子曰父爲御史杖枉死欲赴闕訟無可告者翌日我偕爾往不至家卽同載去竟以此謫戍開平故其書名嶺北

曾魯字敏道讀書好說禮善歐顏楷法日課百字至老不廢

張乾字惟健工畫亦宗馬夏法得意處人謂過張翬能作大字州初立題額多出乾手以薦入直仁智殿

陳天定字定之蒙子儒雅善畫喜元理晚得疾死三日

壬癸志稿

藝苑
二

更生遂號甦庵家多名畫故花草翎毛人物絕勝其山水則宗沈周年八十四作偈而逝

陸晨字昭甫詩畫知名知州李端待以賓禮署後鎮洋山成屬作頌

仇英字實甫畫師周臣工臨摹欲亂真至用丹翠圖像則幽麗清細直追古人後移家郡城女號杜陵內史畫人物有父風

尤求號鳳邱由長洲移居太倉工寫山水兼人物嘗畫小西門關廟壁作行軍勢又畫弁山藏經閣壁作諸佛像皆絕技女適周鳳儀傳父筆且習詩鳳儀亦精畫晚

年夫婦持齋藉畫以給暇則相唱和鳳儀字仲來改名牧
張灝字夷令輔之子以胄子入監見時事甚棘無意仕
進嘗築學山園以娛親縱情詩酒四方名人畢集好篆
刻選子史成語成學山堂印譜八卷多出名人手侍史
何通與焉通字不違著有印史五卷行世

國朝

張復字臨石畫山水師錢穀入能品名滿天下得縑素
爲重同里武起鳴字君揚本姓孔得其傳兼長吟詠

蔡純一字得陽畫法沈周水墨牡丹尤入神又明醫理
壬癸志稿

藝苑

三

投藥輒效醫畫所得隨手輒盡

顧見龍字雲臣善畫人物宗仇英工寫照丰神態度無
不畢肖世祖召入畫院呼爲顧雲臣故常以字行歸
自號金門畫史

顧政字六紀本楊姓從顧見龍學畫人物因冒其姓有
時名

毛鉞字憲宜康熙五十二年武進士官福建將軍標守
備訓練有方每事身先士卒將軍疏薦陞都司以母老
乞歸鉞素習文翰兼工畫理摹宋元名家頗得其妙
吳雯字天翼幼習儒業畫山水極蒼秀從王原祁游有

聲卒於京邸

沈睿字幼白少負逸才盛文譽游情篆籀所鐫刻多古意

王昱字日初居墅溝工山水有高韻族兄原祁開畫局於京師四方善繪者雲集招昱管局事三年業益進凡乞原祁畫者先令昱成圖略加點綴而已歸里後遠近爭造其門以幣致之

周岱字魯瞻父雲驥名諸生能文任俠岱幼奇穎恃才放誕屢應童子試兩藝竟輒作詩或畫花草於卷以故卒不售然益知名嘗遇友人作醪岱涉筆成畫令人持

壬癸志稿

藝苑

四

之市爭購去得錢共飲久之欲遊京師適衛弁有轉漕北上者邀與偕途中頻索畫乃厭苦之登岸覓寓不復入舟比至京某王府聞其名延之賞菊座多名流分韻賦詩席未終岱百韻俱成一座皆驚無何疾作歸至滄州語同伴曰疾驅之某日過州吾乃生否則死矣不及至而卒年四十

吳俶字慎修自號海鷗子畫翎毛花草秀雅生動同時王純字遵一能詩文工書法並善寫生與俶齊名

朱敷字掌綸諸生讀書好古尤精行楷沈起元跋其千字文墨刻謂入歐虞之室

顧瑜字士瑤性孝友精六書著有說文攷證六卷沈德潛稱其博核中年書益工求者滿座應之無倦色餽以金不受自號稼墨老人卒年八十五

王應麟號松亭監生性耽山水規撫前代名畫及王鑑指法間畫人物花鳥亦有宋元筆意年五十後游覽天台雁宕間頗得江山之助

陸燦字景山善丹青工傳神畫大士像尤精彩寓蘇州織造以名聞應召恭寫

御容後西藏僧班禪額爾德尼譯言寶也來朝又奉旨寫

其像卒於京邸

壬癸志稿

藝苑

五

顧鉞字念公善山水舅黃與堅故能畫鉞少依之頗得其傳

陸雲錦字文襄人品端雅善山水得沈周氣韻女琳適崑山唐和春並工花草

錢濤字長源桓立孫增生居家孝友務實學少工書臨摹諸名家咸逼肖晚乃自成一派又得養生真訣耳目聰明嘗語人曰清心寡慾四字一生受用不盡也卒年七十五從弟濟字雨亭亦工書尤善擘窠大字性伉爽家貧不肯隨人俯仰晚年無子以所居宅易田十畝輸入先墓祭籍曰族人歲以一甌祀我此墓不廢我不餒

矣其通識如此

胡兆槐字植三品行修飭工繪事筆意蒼秀韻出天然
王慄字存素諸生性情高簡畫入原邴之室年五十餘
僑寓蘇州踵門乞畫者如市詩筆淡遠有致妻毛秀惠
見列女傳長子廷銓博雅能詩晚歸淨業次子寶林喜
吟詠傳畫學沈德潛贈詩云兒曹亦擅南宗派絕似書
家義獻之

吳嵩字翰周嗜學工文不應制舉愛名人書獨推服米
芾晚年書益工求者踵至又精養生術踰大耋尙健燈
下猶能作楷無疾卒孫震堦字補愚州諸生嚴師範當
壬癸志稿

藝苑

六

事敬禮之

陸時化字潤之恬子監生好藏書畫賞鑑精確子愚卿
字願吾候選布政司經歷舉鄉飲介賓善寫山水花鳥
購求法書名畫皮置愈富孫因儀亦嫻繪事

胡奕虹字覲光善寫花鳥得北宋人沒骨法

王昭麟字公符良穀孫由諸生入監充四庫館校錄選
浙江龍游縣丞擢江山知縣所至有清白聲尤愛士攝
東陽時諸生葉蓁者貧甚知其才厚贍之後成進士昭
麟書法見重於時天台雁宕間碑刻多出其手後以墨
誤歸貧不能自給卒年六十

畢溥字逢原沅從弟工書久客關中唐人碑碣臨摹殆徧後有凌昌霖字得全士錫孫歲貢生書法晉唐里中碑志多出其手

黃震字振宇頊傳立孫工畫山水人物兼精寫真後游陝幕窮探山水之勝畫理益進子大坤工分隸書寄跡吳郡卒

張璆字文玉工篆書有稼墨遺法

張廷植字立成居直塘書法學趙孟頫嘗入都依其戚困甚值除夕部吏雇以代直尙書福康安至部詢知之試以書大加賞異注名使入給事後赴尙書軍營能於壬癸志稿

藝苑

七

馬上書章奏授北流典史遷鹽場大使

李祥鳳字東標乾隆五十一年舉人由知縣左補黃梅縣丞擅六法屢空乏恆賣畫自給世多重其畫謂得司農正傳

王麟孫字振之宸子入貲爲咸陽縣丞寫山水酷似其父從子昫字子能浙江候補鹽經歷亦善山水

王曰申原名應綬字子若原祁立孫諸生能詩工山水與崑山王學浩齊名又工漢隸篆刻爲南昌萬承紀縮摹漢魏分隸百種刻於石硯金石家爭購搨之壬癸志稿十終